

Kerajaan siap sedia hadapi bencana banjir

SHAHALAM – Kerajaan kini telah bersiap sedia bagi menghadapi sebarang situasi berkaitan banjir di Kelantan dengan melaksanakan pertemuan bersama pemimpin tempatan serta badan terlibat.

Timbalan Menteri Kemajuan Luar Bandar dan Wilayah, Datuk Ahmad Jazlan Yaakub berkata, di peringkat BN, satu pasukan khusus akan ditubuhkan bagi membantu jawatankuasa induk menghadapi bencana banjir.

“Menerusi pertemuan yang dilaksanakan dengan pemimpin tempatan sebelum ini, kita turut memberikan kursus kepada mereka dan Jabatan Pertahanan Awam Malaysia (JPAM) akan menjadi agensi utama dalam menghadapi ban-



AHMAD JAZLAN

jir pada tahun ini.

“Oleh sebab itu, kolaborasi di antara semua pihak baik kerajaan negeri atau kerajaan pusat mesti terjalin dengan erat dalam menghadapi situasi sebegini,” katanya ketika sidang media selepas merasmikan Program Asyura

2015, semalam.

Ahmad Jazlan berharap, kerajaan negeri akan mengambil kira pemimpin tempatan dan penjawat awam dari kerajaan persekutuan untuk terlibat sama dalam perbincangan.

Selain itu, katanya, pihaknya kini telah bersiap bersedia dari segi logistik dan mempelbagaikan bekalan yang diperlukan ketika banjir.

“Pengerusi Badan Perhubungan Umno Kelantan, Datuk Seri Mustapa Mohamed juga telah memanggil semua pemimpin persekutuan untuk menubuhkan jawatankuasa di peringkat masing-masing secepat mungkin memandangkan tanggungjawab ini adalah tugas bersama dan melibatkan nilai kemanusiaan,” katanya

Dalam perkembangan lain, ketika diminta mengulas mengenai kebarangkalian wujudnya kerjasama di antara Pas dan BN di Kelantan, Ahmad Jazlan menyokong penuh sekiranya perkara itu jadi kenyataan.

“Kita kena kembali bersatu dan pinggirkan soal kepentingan peribadi. Secara peribadi saya memang bersetuju kerjasama Pas dan BN di Kelantan malah ia adalah nikmat dari ALLAH sekiranya perkara ini dapat direalisasikan.

“Melayu perlu bersatu dan duduk semeja tak kira dari mana parti pun bagi mempertahankan maruah negara kita dan sekiranya melayu berpecah, nescaya maruah bukan saja tercalar, hak kita juga akan hilang,” katanya.